


滬游雜記

卷一

武林葛克煦理齋
光緒二年
上海葛克煦記

ル 5
3601
1





得 雜
造 器



門 5
號 3601
卷 1



嘗考上海邑志載本邑於前明分自華亭蓋
濱海一小縣耳我朝因之自太倉之瀏河口
淤淺後海舶改由吳淞出入於是漸臻繁盛
迨道光季年五口通商中外互市遂成巨觀
近則輪舶愈多外海長江四通八達人物之
至止者中國則十有八省外洋則廿有四國
猗歟盛哉自生民以來未有若是之美備者
也向稱天下繁華有四大鎮曰朱仙曰佛山

曰漢口曰景德自香港興而四鎮遜焉自上
海興而香港又遜焉予履茲土廿有餘載目
見耳聞日新月盛思仿日下舊聞都門紀畧
體例編輯成書俾士商之來游者有所稽攷
不致心迷目眩苦於塵勞鮮暇未獲如願吾
友同里葛君理齋寓滬有年時相過從茶餘
飯罷歸輒編記若干則日復一日積久成帙
分爲四卷頗便繙閱美矣備矣蔑以加矣謂

爲滬游指南之針亦何不可因慙惠付梓並
爲序其緣起云

光緒二年丙子冬十一月錢塘袁祖志翔甫
氏識

余游上海十五年矣寓廬屬在洋場耳目所及見聞遂夥因思此邦自互市以來繁華景象日盛一日停車者踵相接入市者目幾眩駭駭乎駕粵東漢口諸名鎮而上之來游之人中朝則十有八省外洋則二十有四國各懷入國問俗入境問禁之心而言語或有不通嗜好或有各異往往悶損以目迷足裹爲憾旅居無事爰仿都門紀畧輯成一書不憚

煩瑣詳細備陳俾四方文人學士遠商巨賈
身歷是邦手一編而翻閱之欲有所之者庶
不至迷於所往卽偶然莫辨者亦不必詢之
途人似亦方便之一端若謂可作游滬者之
指南針也則吾豈敢光緒二年冬至日仁和
葛元煦識

滬游雜記弁言

一是集係仿都門紀畧而作首載風俗人
物專取近年目前事蹟隨記隨錄並不
分門別類另列英法美三國租界地圖
及各國通商船旂式樣其城南勝跡閒
及一二以備游滬宦商便覽

一滬上竹枝詞有散見申報者有彙刻成
書者不一而足其餘古今各體詩詞歌

賦亦復美不勝收是集吟咏惟選未刊
之申江雜詠六十首閒擇各體詩賦詞
曲以供賞玩

一四卷附載絲茶錢滙等業行棧字號住
址以便遠方人來入市交易易於查閱
原知常有遷移增減未足久憑擬於丁
丑春起隨時增修倘有舛錯之處仍望
各商號知照更改尤爲幸甚

一各洋行外國往來輪船甚夥其不載客
者一概不列惟英法兩國公司輪船可
以搭客往來香港故將船名畧載一二
俾可查考

一滬地洋行有二百餘家未能全載僅擇
著名者數十家附入四卷



一上海自通商後北市繁華日盛一日與
南市不同宦商往來咸喜寄跡於此故



卷內所載惟租界獨備非敢畧彼而詳此也

一北市烟花遍地淫靡成風不載則嫌其缺畧詳載又恐傷風化然桑間濮上孔子不刪未始非示人以勸懲也茲集揭出青樓俗例二十六則祈閱者勿以辭害意焉可耳

一是集原備採風問俗起見逐條所記皆


實情實事毫無虛飾惟一人耳目難周誠恐掛一漏萬閱者諒之








東




大清國旗



黃色綠邊青龍兼五彩


大清國常用旗




同上

通雅

美




大英國旗




旗色分四角人黃底藍立
獸紅底黃兩疊獸黃底紅

大英國通商常用旗




紅正色裏角斜
十字紅底藍

大日本國旗




白色圓圖紅色

大法國旗




大法國通商常用旗



小旗分三色
同前無花樣


大旗分三色中
白外紅裏藍花
白中圖藍底黃
鳥兼五彩

大丹國旗




紅十字白
物黃色兼五彩

大丹國通商常用旗




紅十字
字白色

大 美 國 旗




紅白相
間裏角
白花藍
底

大 荷 蘭 國 旗




上紅中白下
藍色花樣黃
兼雜色

大 荷 蘭 國 通 商 常 用 旗




同上無花樣

大 瑞 威 頓 國 旗




藍色十字黃
藍色裏角花樣
相間藍紅黃白色

大 瑞 威 頓 國 通 商 常 用 旗




同上中加
花樣白色

大 比 路 國 旗



中白裏
外紅色
花樣雜
色

大 意 大 利 國 旗




中 白 外 紅 裏
綠 三 色 花 樣
十 字 白 底 紅
上 間 黃 色

大 俄 國 旗




黃 色 花 樣 黑 間 雜 色

大 俄 國 通 商 常 用 旗




上 白 中 藍
下 紅 三 色

大比利時國旗




中黃外紅裏黑
三色居中花樣
顏色無常

大比利時國通商常用旗




同上無花樣

大日斯巴尼亞國旗




花樣五色相間用
紅黃白三色居多

大日斯巴尼亞國通商常用旗



黃紅二
色相間

大北德意志國旗




旗黃底中圖白底
十字花樣皆黑色

大北德意志通商常用旗




白色黑邊花
樣兼黃色

大奧斯馬加國旗



黃色邊用黃紅藍三色
間鳥黑中白圖白人黃

大奧斯馬加通商常用旗



上下紅中
白字黃色

滬游雜記卷一目錄

上海交界里數 租界

馬路 陰溝

陰井 大橋

道旁樹木 租界例禁

上海城隍 神誕日

武聖宮 邑廟東西園

也是園 徐氏未園

徐家滙花園

外國花園

外國花卉

法華牡丹

春申侯祠

青蓮庵

一粟庵

施廟

黃婆庵

靜安寺

龍華寺

紅廟

城隍會

茅山會

盂蘭盆會

蘭花會

菊花會

賽花會

水龍會

賽跑馬

賽跑船跑人

江海關

製造局

會審公堂

會捕局

廣方言館

博物院

牛痘局

善堂

放生羊

放生龜

工部局

巡捕房

申報館

客棧

萬國公報

格致彙編

西曆

禮拜

房捐

保險

棉花生日

救生輪舟

房價

教習英語文字

救食生洋烟

輪船招商局

新報館

號頭

大白鳴鐘

午正砲

火警鐘

洋水龍

馬車

腳踏車

東洋車

小車

灑水車

垃圾車

滬游雜記卷一

武林葛元煦理齋

上海交界里數

上海縣東至川沙廳界三十里西至青浦縣
界三十六里南至南匯縣界七十二里北至
寶山縣界十二里東西橫六十六里南北縱
八十四里

租界

租界在滬城東北周十餘里以河爲界法國自小東門外陸家石橋河北起至北門外三茅閣橋河南止英國自三茅閣橋河北起至二擺渡老閘河西南止美國自二擺渡河東北起至外虹口一帶止三國租界英居中地廣人繁洋行貨棧十居七八其氣象尤爲蕃盛法附城東北隅人烟湊密惟街道稍覺狹小迤東爲閩廣幫聚市處美祇沿江數里皆

船廠貨棧輪舟碼頭洋商住宅粵東甯波人
在此計工度日者甚衆

馬路

租界大街由東至西者統稱馬路同治初惟英界大馬路稍覺寬暢亦不免泥水垢穢經工部局陸續整理兩旁砌以石礮較馬路稍高礮下砌石條微側引水入溝雨過卽可行走專司馬路工程者爲馬路管又稱街道廳

其法先將舊泥鋤鬆滿鋪碎石或瓦礫七八寸使小工以鐵鎚擊碎再加細沙一層用干筋鐵插合數十人牽挽從沙面滾過其平如砥遇小缺陷隨時修補英界南之陳家木橋蕩釣橋北之珊記碼頭老閘等處爲擔水要道改用碎石大小疊砌以石灰膠泥拌摻縫內水不存積歷久不壞且每日掃除兩次尤爲潔淨

陰溝

馬路陰溝以磚兩層砌腰圓式直通黃浦隨潮水爲漲退路旁石砌下通溝處砌方式水倉一所較溝深三四尺使水沖入倉內汙泥沈底清水入溝經雨數次揭起倉面石板以長勺撈出污泥則陰溝永無壅塞之虞馬路疊經修築十數年閒高幾二尺陰溝亦隨之而高矮巷舊屋愈形窪下小溝積水竟無出

泥游雜語 卷一
路交夏後聚蚊成雷難免濕鬱之患必得產
主將房屋墊高陰溝重砌方妙

陰井

上洋潮退河溝皆涸一遇火災無可施救西
人於距河稍遠之地路底築大井十口一字
排列井底通連上鋪鐵蓋使車馬往來無虞
傾陷用時揭蓋以水龍尾拖入吸水洵救急
之善策也

大橋

頭擺渡老閘兩處西人造大橋二行人往者
每輸錢四文來者亦然車輿倍之近歸工部
局買回不復輸錢更添二橋以便行旅惟馬
車過橋不容馳驟耳

道旁樹木

租界沿河沿浦植以雜樹每樹相距四五步
垂柳居多由大馬路至靜安寺亘長十里兩

旁所植葱鬱成林洵堪入畫

租界例禁

- 一禁馬車過橋馳驟
- 一禁東洋車小車在馬路隨意停走
- 一禁馬車東洋車夜不點燈
- 一禁小車輪響
- 一禁路上傾積垃圾
- 一禁道旁小便
- 一禁肩輿挑擔沿路叫喝
- 一禁燃放花爆
- 一禁不報捕房在門外砌路開溝及拆造臨街房屋
- 一禁私賣

酒與西人飲 一禁春分後霜降前賣野味

一禁賣臭壞魚肉 一禁賣夜食者在洋

行門首擊榔高叫 一禁肩挑倒掛雞鴨

一禁吃講茶 一禁沿途攀折樹枝 一禁

九點鐘後挑糞擔 一禁乞丐 一禁夜間

行人形跡可疑及攜挾包裹物件手無照燈

一禁聚賭酗酒鬪毆

上海城隍

相傳城隍神卽邑人秦裕伯元時人明初徵
爲行省參議不就歿後屢著靈跡爲生民保
障殿前列石阜隸四傳聞自海上浮來甚奇

神誕日

三月二十三日爲天后誕粵閩客商及海舶
皆演劇伸敬三月二十八日爲城隍夫人誕
鄉鎮婦女進香甚衆六月二十三日爲火神
誕大東門內街市店舖皆懸燈結綵二十四

日爲雷祖誕廟在新北門內毘連丹鳳樓爲
小穹窿七月底爲地藏王誕庵在大東門南
城腳二六九月大士成道及誕辰新北門內
沈香閣大馬路紅廟香火最盛

武聖宮

武聖宮有三處一在西門內大街爲地方官
春秋致祭之所一爲大千勝境在城西北隅
規模宏壯可資遠眺夏宜納涼冬宜賞雪一

爲丹鳳樓在城東北隅樓閣皆附於城堞窻臨黃浦可以觀濤

邑廟東西園

東園卽內園在廟後東偏迴廊曲折山石嶒嶸結構頗奇幻歲修爲錢業承值每屆合節或蘭花會方開園扉任人游覽豫園爲前明潘充庵方伯所建地約四十餘畝極亭臺池沼之勝後潘姓式微園亦漸圯時申浦初通

海舶商賈雲集潘氏急於求售衆遂以賤值得之歸邑廟爲西園池心建亭左右翼以石橋名曰九曲橋又有杏雪堂三穗堂萃秀堂點春園諸名勝堂上皆懸邑神畫像園西北隅有巨石疊作峯巒磴道盤旋而上重九登高者甚衆惜園內競設茗館及各色店舖竟成市集凡山人墨客及江湖雜技皆託足其中迥非昔時布置未免喧囂嘈雜耳

也是園

也是園亦名南園卽蕊珠宮祀文帝斗母諸神疊石鑿池栽花種竹頗饒林泉之趣園中荷池廣數畝花時游人甚衆有額曰塵飛不到爲呂仙此筆其門外榜曰地近蓬萊

徐氏未園

粵東徐君雨之於二擺渡河北構一園名曰未園地雖不廣然一邱一壑頗具匠心凡中

外奇花異卉栽植無遺真塵俗中別開生面也

徐家滙花園

園爲波利洋行所建遍植中外花木姘紫嫣紅規模畧具並奏西樂招中外人游賞盤餐兼備所費無多當夕陽欲下西人往往挈二三知己徘徊其閒華人則終鮮過而問津者

外國花園

園在英界虹口大橋沿江一帶徧地栽花隨處設座每日申酉時爲西人挈眷攜童游賞之所

外國花卉

滬地自通商後洋船帶來各國花卉奚止百數十種名目甚繁未能繙譯備載其花卉顏色雖各極鮮妍而絕無香氣殊不可解草本最多藤本花皆千葉惟玫瑰一種花蕊倍大

於中國香氣亦終不及耳

法華牡丹

法華牡丹甲於四郡相傳居西鎮之李氏自洛陽攜回百餘種植之澁溪園中有紫金球碧玉帶二種最爲名貴色香俱勝花時游賞者遠近畢集園主人張筵請客稱韻事焉自李園廢於兵燹後藝花者分種滋培當春作花肩挑市販至今僅存十餘種而已

春申侯祠

祠在老北門外三茅閣橋西北岸燬於兵燹
邑人移建北門內同治初河干尚有春申古
蹟牌坊今則并廢矣

青蓮庵

庵在老北門內卽顧氏露香園故址臺榭園
林昔擅一邑之勝今則惟佛火長明六時禪
誦庵前方池植以芰荷四圍樹木陰翳猶有

城市山林景象焉

一粟庵

上海學宮書院善堂皆在城內西南隅地甚
曠濶居民徧植桃蔬花卉藉以獲利近南爲
一粟庵庵不甚廣引水栽竹池廊曲折囂塵
中居然具林泉幽致官紳士庶慶弔等事借
此修醮諷經清齋醮客殆無虛日

施廟

河漢雜言 卷一
廟在城中虹橋上神之來歷無可考證廟基
不過四五椽求方許愿者麇至麻集青樓中
尤爲敬信

黃婆庵

庵有新舊二一在楊家橋爲老庵一在胡家
橋南爲新庵庵祀黃婆塑老嫗像向來香火
最盛每屆秋成演戲酬神近則屋宇蕭條香
烟久替爲木棉生計者竟至數典忘祖不可

解也至黃婆事詳見墨餘錄中

靜安寺

寺在城西北十餘里規模向宏厥今則傾圮
居多門臨馬路與法華東鎮相距數里每年
四月八日爲浴佛會地本僻靜互市後馬車
盛行游人始駐足焉

龍華寺

寺在龍華鎮距城南十八里有浮圖七級聳

入雲霄每歲春閒傳戒三月十五日爲龍華
會期香火極盛

紅廟

紅廟卽司徒廟在大馬路西內供大士像僅
平屋數間求籤問筮者踵相接也粵妓尤信
奉每燒全豬爲供獻佛門素高齋此地獨
奉犧牲可發一噓

城隍會

邑神年例逢春秋冬三節出會祀孤無他儀
從惟阜隸相隨者不下百數十人至夜閒跑
馬青年婦女披髮著紅衫褲雜行其閒最爲
陋俗旋經邑侯禁止此風稍息

茅山會

茅山殿卽萬福行宮在西門內滬上各行棧
及娼家皆信奉之每年春閒俗傳真君赴句
容大茅山解餉回殿日儀仗整肅隸役扮演

儀狀猙獰頗駭人目

孟蘭盆會

廣肇山莊在新聞西爲粵人厝柩之所每屆中元節仿唐武后孟蘭盆會建水陸道場各行飲助臺閣雜耍紙紮人物爭奇鬪巧前邑侯以迎神賽會本干例禁出示禁止祇准設壇諷經屆期游人畢集極爲熱鬧

蘭花會

滬俗尚蘭蕙有梅瓣水仙瓣荷瓣等名愛者以重值購之甚至一花值數十金會設邑廟園中二月在船舫廳者爲蘭三月在內園者爲蕙屆期各蒔植家以佳種入會裝几湘簾磁盆竹格陳設幽雅游賞者甚衆

菊花會

會設邑廟內園之萃秀堂地饒林園之勝內則萬卉千花高低羅列其種之最新者有若

碧桃紫牡丹洋蝴蝶雪青帶金絲桃諸名色
其種之最貴者有若御袍黃黃金帶玉帶蟹
爪雪獅松針諸名色其種之最異者有若黑
牡丹紫燕飛霜蒲萄紫楊梅紅紫臺捧桂金
銀臺諸名色目眩神搖令人心醉微風過處
又有清香沁人心脾不減陶彭澤東籬風味
也

賽花會

西人賽花會始於光緒乙亥年設英領事署
後園凡華洋奇花異草皆可入會聽評甲乙
擇尤獎贈丙子首夏舉行第二次每次兩日
午後准中外士女入園玩賞每客收洋峽一
枚以備茶點之需

水龍會

西人水龍會每年夏秋間舉行一次是夜齊
集浦灘各水龍排定次序居前者爲滅火龍

另紮一紙龍置車上中燭以火旁懸五采琉璃燈其後十餘車裝如前式閒以花炮火球火鏡火字及西人音樂光怪陸離耀人耳目來觀者人如潮湧昔人所謂噓氣成雲揮汗成雨者不是過也嗣以出會後必有火警故不復迎賽僅於浦灘上演習放水之法云

賽跑馬

大馬路西西人闢馳馬之場周以短欄所以

防奔軼也春秋佳日各賽跑馬一次每次三日午起酉止或三四騎或六七騎衣則有黃紅紫綠之異馬則有驪黃騮駱之別並轡齊驅風馳電掣場西設二廠備校閱以馬至先後分勝負第三日增以跳牆跳溝跳欄等技是日觀者上自士夫下及負販肩摩踵接後至者幾無置足處至於油碧香車侍兒嬌倚者則皆南朝金粉北里臙脂也鬢影衣香合

人真箇銷魂矣

賽跑船跑人

西人跑馬之後又有跑船跑人之戲船長二三丈濶二三尺不等頭尖身小躡絕無倫其比賽在新聞大王廟前以八人打槳一人把舵亦有四人打槳者翻波撥浪疾若飛鳧跑人在跑馬場中其起步處界以白灰肥者前瘠者後一人執鐵銃爲號砰然一聲雙足齊

舉飛行絕跡誠足快人心目云

江海關

關有南北二處南關在大東門外設於庫口閒凡沙船出入例稅於此稽收焉道光閒中外互市滬上爲通商總集增設北關在浦灘上專司洋船稅課紅巾之亂北關幾廢英國駐香港公使以爲例當輸納於是復設並以西人爲稅務司一正三副遂與南關分司課

稅云

製造局

製造局卽機器廠離城南數里地廣四百餘畝工匠二千餘人以機器製造輪船及各種軍械又有火箭分廠在陳家港火藥局在龍華寺南均以西匠一人爲監製

會審公堂

會審公堂爲辦理中外交涉事務而設租界

中凡小竊鬪毆等事由巡捕房解堂審理一在法界領事公署逢禮拜二四六委員與法國領事會審一在英界大馬路西卽洋涇浜理事公廨除禮拜日外每日委員與英美二國領事會審若人命及軍徒各案仍照定例移縣辦理

會捕局

會捕局專司訪緝租界內盜賊募用暗查密

訪之人以通線索名線勇與捕快無異局創
自同治初年由道委員辦理頗著勞績

廣方言館

館在南門外製造局旁重樓傑閣門外種竹
萬餘竿濃陰夾道幽雅宜人館內以文童合
例者充選西士教習算學及西國語言文字
制器尚象之法三閱月一考核如有才能出
衆能辦洋務者卽授以職

博物院

西人設博物院彙集西國新異之物陳設院
中上而機器下及珍禽奇獸入其中者可與
見聞可資格致誠海外鉅觀也

牛痘局

牛痘法本蒙古傳於外洋種用鉛薄小刀刮
破臂上膜皮男左女右將痘漿滴入候乾三
四日後起泡發漿不延他處種以三粒或四

粒爲度種三次決無後患數日結痂不必避
風忌口屢著成效邑廟園內官設牛痘局貧
民無力種痘者至局施種租界則外國醫院
工部局亦設局施濟

善堂

上海善堂林立有同仁輔元果育普育清貧
等堂及安老院保息局牛痘局保嬰總局或
治病施藥或給棺掩埋或收養殘廢或設塾

教讀屆冬令又開設粥廠並給棉衣米粟種
種善事不勝枚舉租界則洋人設仁濟醫館
以外國法治病傷科尤妙設館以來活人無
算

放生羊

邑廟後園地最曠放生之羊不下百數有三
足者有獨角者往往出遊城外或趁渡至浦
東遊倦乃還居民游客不敢觸焉當紅巾踞

城時有烹食者皆猝死豈羊之有靈歟抑物
久有毒歟後以滋生日繁董其事者分置放
生所自此園中石畔不復訛寢成羣矣

放生龜

邑廟園沼中有以龜放生者不數年池魚被
食殆盡夜間上岸覓食甚至嚙人董事召漁
者捕之縱之江心其患遂絕

工部局

工部局英法兩租界皆有之董其事者皆西
商公舉之人由董事立巡捕頭日分派各種
職司如修填道路巡綽街市解押人犯救火
郵災等事係西人辦公滙總之所英工部局
在慕盤街北法工部局在法界大馬路西

巡捕房

英工部局分設巡捕房二一在美國租界一
一在盆湯街中法工部局分設巡捕房一在

小東門碼頭遇有要事電報傳信迅速無比

申報館

申報美查洋行所售也館主爲西人美查秉筆則中華文士始於壬申三月除禮拜按日出報每紙十文京報新聞及各種告白一一備載各省碼頭風行甚廣先有字林洋行之上海新報繼有粵人之滙報彙報益報等館皆早閉歇

客棧

上海爲通商碼頭輪船所至南閩粵北燕台天津及出外洋往各國必經之地商旅最夥客棧因此而盛輪船到埠各棧友登舟接客紛紛擾擾同寓之人亦五方雜處行囊旅橐必須親自檢點庶無遺誤

萬國公報

萬國公報出林華書院摘錄京報及各國近

事逢禮拜六出書一卷本名中西新報周年
五十本售洋一元

格致彙編

格致彙編秉筆者為英國傅蘭雅編內詳論
格致功夫及置造機器諸法繪圖集解月出
一卷周年價值半元在格致書院印售

西曆

西曆無閏故以三十日為月小三十一日為

月大核之三百有六旬又六日仍與中曆無
異惟日辰不無參差元旦較中國先一月耳

禮拜

七日一禮拜為西人休息之期

即中曆虛房
星昴四宿值

是日也工歇藝事商停貿易西人駕輕車
騎駿馬或攜眷出遊或赴堂禮拜華人之居
停西商者於先一日禮拜六夜徵歌命酒問
柳尋花戲館倡寮愈覺賓朋滿座云

房捐

租界房屋工部局估值抽捐以房價之低昂定捐數之多寡每值百元捐洋八元分四季收取作租界各項工程並一切善舉之用從前尚有路燈垃圾等捐今已併入房捐矣

保險

保險創自西人如房屋船隻堆運貨物無不可保險卽人亦有保險章程其法估本提費

或以年計或按次算設遇水火不測卽照原估本銀賠償

棉花生日

上海鄉民種棉爲業俗以七月二十日爲棉花生日喜晴忌雨諺云雨打七月念棉花弗上店俗語靈驗十應八九

救生輪舟

黃浦江中海舶停處桅檣林立潮汐漲退水

勢極溜渡船舳板往來載客時有失足落水
之慮南門外設有救生輪舟一艘一日駛南
一日駛北往返巡察洵屬善舉

房價

上海租屋獲利最厚租界內洋商出賃者十
有六七樓屋上下各一間俗名一撞後以披
屋設竈市面租界每月五六七兩銀數不等
僻巷中極廉每間亦需洋銀三餅昔人言長

安居大不易今則上海居尤不易焉

教習英語文字

上海中外交易初皆不知英語非通事不可
近則各行棧皆有一人能說英語蓋邇年設
有英語文字之館入館者每日講習一時許
卽止月奉修金無多穎悟幼童半載卽能通
曉

救食生洋烟

鴉片烟之流毒中國久矣上自士夫下及貧
販幾至無人不染指焉卽食生烟自盡之案
亦復層見疊出而救治得生者十僅一二三
蓋諸方均用嘔吐等藥不知吞食者往往以
酒調服毒流臟腑其逗留上中焦者可吐而
生其流入腸胃以下者則不可吐而死矣武
林汪雲伯大令有用甘草一觔煎濃汁灌治
之法十可活八九蓋用吐不若用解之爲愈

也按甘草性解諸毒於洋烟尤宜灌下汁多
能追入大小腸蕩滌烟毒用意最深查單方
內有以甘草熬膏調入烟內每兩逐漸加至
四五錢卽能斷癮可爲解烟毒明證惟恐一
時熬膏不及仁人君子不妨多備以濟世可
也

輪船招商局

合肥李伯相勅立上海招商局製備輪舟載

客載貨以便商民販運北至天津南至閩粵
東至日本暨長江一帶均有輪船往還搭載
一如西國之制係由衆商集資彙辦不設官
員專用巨商董司其事行之數年頗著成效
局設三馬路東另立碼頭在下海浦規模宏
敞與旗昌太古鼎足而三焉

新報館

上海近添新報館在法租界之甯興街於丙

子十月初八日起售報章程一如申報惟開
以英國文字一二段少有區別

號頭

租界華洋房屋工部局於門首用小牌編明
字號洋房牌用腰圓式寫某路第幾號華屋
橫方式以千字文編列號數兼用中西文字
取其收捐覓人易於查考

大白鳴鐘

鐘設法工部局離地八九丈高出樓頂勢若孤峯四面置針盤一報時報刻遠近咸聞丙子夏修造改低約二丈僅用針盤一面製較狹小城南董家渡天主堂亦有大自鳴鐘較此則又稍低矣

午正砲

西人設兵船於黃歇浦逢禮拜一五准十二點鐘放砲一聲響傳數里以便較對鐘表

火警鐘

英工部局旁設一木架頂懸大鐘高聳似塔架分五層以梯盤旋而上遇火警先撞亂鐘數十下稍停再以鐘之聲數分地段如美界一聲一停英界在大馬路北二聲一停大馬路南三聲一停法界四聲一停晝則懸旂夜則掛燈以示方向租界禮拜堂亦擊亂鐘相應各處水龍聞聲赴救頗稱迅速

洋水龍

西人水龍製最精法用皮管長數十丈使管尾浸入水中數人鼓動機器能吸水從口出勢如驟雨灑空滂沱四注頓使祝融爲之霽威工部局所製則以火運動機器不煩人力且能及遠

馬車

西人馬車有雙輪四輪者有一馬兩馬者其

式隨意構造宜雨宜晴各盡其妙近來華人設稅車廠馳驅半日價約洋銀兩餅賈客倡家往往稅坐游行近則沿黃浦繞馬路遠則至徐家匯靜安寺然不及西人車堅馬馴往往失事

腳踏車

車式前後兩輪中嵌坐墊前輪兩旁設鐵條踏蹬一上置扶手橫木一若用時騎坐其中

以兩足踏燈運轉如飛兩手握橫木使兩臂撐起如挑沙袋走索之狀不致傾跌快若馬車然非習練兩三月不能純熟究竟費力近不多見

東洋車

東洋車雙輪旁轉前支兩木繫一小橫木一人挽而曳之人以價廉隨地僱坐然疾走須防脫輪婦女乘坐亦有從後竊取首飾者

小車

小車獨輪在中兩木在後一人推之通行已六七載坐人運貨輕便特甚價更廉於東洋車然推物遠颺往往不免車後安置物件宜防串竊馬路定例往車向左來車向右不容紊亂卽空車停歇亦有定處東洋車亦然

灑水車

車上駕方木櫃可儲水數十擔櫃後橫鐵管

一編鑿細孔其管上通水櫃內設樞紐用時以索掣開水卽從管孔噴出勢如驟雨驅馬疾行約可灑半里許真撲去俗塵三斗也

垃圾車

馬車上駕大木櫃隨行夫役數名每日兩次掃除街道

滬游雜記卷一

葛氏嘯園藏板

